

HANES
YMFUDIAD Y SAINT

I
CALIFORNIA;

YN GYNNWYSEDIG.

MEWN DAU LYTHYR O NEW ORLEANS, AMERICA,
UN ODDIWRTH CAPT. D. JONES, A'R LLALL
ODDIWRTH MR. THOS. JEREMY, (GYNT
O LANYBYDDER),

AT

OLYGYDD "UDGORN SEION."

MERTHYR-TYDFIL:

ARGRAFFWYD AC AR WERTH GAN J. DAVIS, GEORGETOWN;

AR WERTH HEFYD

Gan y Saint yn gyffiedinol, a llawer o Lyfrwerthwyr,
taw y Dean a'r Gogledd.

1849.

PRIS DWY GEINIOG.

1877

THE CALIFORNIA

CALIFORNIA

THE CALIFORNIA

THE CALIFORNIA

THE CALIFORNIA

THE CALIFORNIA

THE CALIFORNIA

AT Y DARLLENYDD.

DYMUNAF hysbysu y darllenydd, mai achos cyhoeddiad y Llythyrion canlynol yn lyfryn, yw, o herwydd eu bod yn ormod o faint i'w gosod yn UDGORN SEION, fel ag oedd yr ysgrifenydd yn bwriadu. Mae yr hanes a gynnwysant yn ddifyrus ac adeiladed iawn, ac wedi ei chydawau â dysgeidiaeth werthfawr ynghylch llawer o bethau tra buddiol, yn neillduol i'r rhai a fwriadant ymfudo. Tra mae y Captain mewn llawn waith gyda'i ganlynwyr anwyl ar y ffordd i wlad bell, nis gall yn ei fyw anghofio ei frodyr a'i chwiorydd sydd ar ol yn Nghymru, eithr cymmera drafferth neillduol i ddesgrifio iddynt bob peth perthynol i'w brodyr ymadawedig, fel y byddo iddynt gael eu cysuro a'u dyddanu yn ei absennoldeb.

Pan oedd Capt. Jones fel hyn yn gofalu am danom, nis gallaf lai na gwenu wrth weled caredigrwydd y diafol yn ceisio ei efelychu. Rhoddaf yma gopi o lythyr a dderbyniais ychydig o flaen un Capt. Jones, dyben pa un oedd twyllo y Saint. Mae wedi ei ysgrifenu ar bapyr a ddesnyddia yr Odyddion, ac yn cynnwys eu harwyddlun; a cheisir efelychu *post marks* arno, trwy ei stampio â sel ysgrifenydd Odyddol, ar yr hon y mae gair lled debyg i "Llansamlet." Dyma y llythyr:—

"New Orleans, Gulf of Mexico, Feb. 27, 1849.

"Fy Anwyl Frawd yn yr Arglwydd,—Y mae yn dda genyf i allu eich hysbysu ein bod wedi tirio yn ddiangol yn New Orleans, wedi byr fordaith gysurus. Y mae gofal amlwg am danom, yr hyn a brawf yn eglur i'r byd wirionedd ein crefydd, er cymmaint o ddweyd yn ei herbyn sydd gan y lliaws gau-grefyddau'r byd; a dichon y daw y llythyr hwn i law hefyd braidd yn wyrthiol; os felly, cyhoeddwrch ef gerbron y cyhoedd, a dywedwrch yn Gath ac yn Ascelon am osal rhagluniaethol ein Tad nefol am danom. Yr ydym yn myned oddiyma i Nauvoo, ar lôn yr afon Mississippi, yn nhalaeth Illinois, ac oddiyno i Council Bluffs, yn nhalaeth Missouri. Dangosodd angel mewn breuddwyd y directions atoch;

hysbyswch hyn hefyd i bawb. Dywedwch wrth bawb o'r brodyr ein bod yn iach a chysurus, ac yn argyhoeddi y byd fel ydyn yn myned yn y blaen; a bydd ein rhif yn filoedd erbyn y cyrhaedd-om ben ein taith: a chyn hir, dadymchwelwn holl deyrnasocdd y ddaear, a byddwn fyw fil a dau cant a thrugain o flynyddocdd wedi i hyny ddod i ben. 'Does genyf ddim amser i ysgrifenu llawer atoch, am fod fy ngofal yn fawr.

"Ydwyf, yr eiddoch yn serchog,

"Eich tad yn yr Arglwydd,"

"CAPT. DAN JONES.


"To Mr. W. Llewellyn, Merthyr."

Mae y cyfarwyddyd oddiallan fel hyn:—"Mr. J. Walter Llewellyn, at Mr. Ed. Morris, Tai-yr-ysgol, Llansamlet, near Swansea, Glamorganshire, Wales." Ni ddywedaf ragor am dano, ond cynghoraf y Saint i beidio colfarnu pob Odydd o herwydd drygioni rhai; a bydded iddynt ymdrechu o hyd i fod yn gyfrwys fel y sarff, a diniwed fel colomenod.

Gwelir wrth lythyron fy mharchus frodyr, pa faint o au-brophwydi yn Nghymru, fydd yn suan yn gorfod cywilyddio am yr llyn a brophwydasant yn gelwyddog am y Saint. Bydd y cyfan, a brophwydwyd, er hyny, yn ddaioni mawr; oblegid, caiff yr onest eu calon gyfleusdra i adnabod pwy yw eu ffryndiau.

J. DAVIS.

Merthyr, Mai 26, 1849.

 Wedi i ni argraffu oddeutu pymtheg cant o'r llythyron canlynol, gwelsom lythyr arall o New Orleans, dyddiedig Ebrill 30, 1849, oddiwrth Mr. Thomas Richards, gynt o'r Mynydd, Merthyr, at ei frawd Mr. William Richards, o'r un lle, yn hysbysu fod y gweddill o'r Saint a aeth ymaith yn y llong "Hartley," oddeutu wythnos neu ragor ar ol y llong arall, wedi cyrhaedd yn iach a diangol ar y 29ain o Ebrill, ac wedi cael mordaith ddymunol. Dyweda fod dau blentyn wedi eu geni, a phedwar o'r morwyr wedi eu bedyddio, ar y môr; ac hysbysa fod Capt. Jones a'i Saint wedi myned rhag eu blaen i St. Louis, ychydig cyn eu dyfodiad hwy i New Orleans.

YMFUDIAD Y SAINT.

LLYTHYR, ODDIWRTH CAPT. D. JONES AT OLYGYDD
"UDGORN SEION."

New Orleans, Ebrill 18, 1849.

ANWYL FRAWD DAVIS,—

YN ol fy mynych addewid i'r Saint anwyl a adewais ar ol yn Nghymru, rhoddaf hanes ein taith dros y weilgi hyd yma. Diau fod llawer o chwedlau wedi cael eu taenu drwy Gymru am danom, ac o brophwydoliaethau am ein boddiad, &c.; am hyny, erfyniaf arnoch hysbysu drwy eich "Udgorn" mai gau yw yr oll hyd yn hyn—ein bod ni etto yn fyw, er mai yr ochr draw i'r môr oddiwrthy chwi. Gobeithiaf y credant nad o *fyd yr ysbrydoedd* y daeth y llythyr hwn. Hefyd, ni throdd y Captain y llong i Cuba, a gwerthu y Saint yn gaethion, hyd yma, megys ag y prophwydwyd drwy "Seren Gomer, &c., y gwnaethai. Ffeithiau fel hyn a brofant pwy ydyw y gau brophwydi.

Onid at hanes ein mordaith. Gan fy mod yn ysgrifennu i sylw llawer ag ydynt yn bwriadu ein dilyn hwyr neu hwyrach, pa rai y dymunwn eu dedwyddwch, caniatewch i mi fanylu yn y pethau mwyaf addysgiadol, fel yr ennilliant hwy oddiwrth esiamplau. Yn ganlynol i'r hanes a glywsoch am danom o Llynlleifiad, hysbysaf ddarfod i ni cyn hwylio, sef y Sul cyntaf wedi myned i'r llong, sefydlu ein hunain yn Ganghen ymfudol, neu nosiadwy ar y dyfnder, etto i fod mewn ystyr arall yn gangen sefydlog, a detholwyd yr amrywiol swyddwyr i lanw y gwahanol gylchoedd perthynol. Cynnaliafom gwrdd Saint, cyfranwyd y sacrament, a chawsom brofion amlwg fod cymmeradwyaeth i'n haddoliad gan y Nefoedd, drwy bresennoldeb yr Ysbryd Glân yn ei ddylanwadau hyfryd; a chawsom brofion amlwg fod y gelyn, megys yn nyddiau Job, wedi dyfod yno hefyd, drwy iddo feddiannu un chwaer, hyd nes yr oedd wedi ei hanmbwylllo, achosi iddi ysrechain, a thraethu pethau annynol a rhegferdd dychrynlyd; eithr ni chadwodd ei mwster yn hir, ond drwy arddodiad dwylaw yr henuriad, a gweddi y ffydd, gwelodd ein Tad yn dda i selio addewid ei Fab "i'r rhai a gredant," ar fôr a thir, sef—"Yn fy enw i y bwriant allan gythreuliaid;" ac O, mor werthfawr oedd y fendith y tro hwn.

Dosparthwyd y llong yn wyth o ddosparthiadau, yn ol rhif y teuluoedd. Gosodwyd henuriaid i arolygu dros bob dosparth, i ofalu fod pawb yn ddidderbyn wyneb yn gwneyd ac yn cael cyfiawnder, yn magu ac yn meithrin cariad ac undeb, ac yn neillduol i weled ar fod pawb yn cadw y lleoedd yn lân ac iachus. I'r

dyben hyn, trefnwyd fod i ddau bob boreu godi o flaen y lleill ar gylech, a golchi y llawr, &c., yn lân, a'i sychu. Yr wyth llywydd hyn, ynglyd â thrioedd ereill, sef William Morgans, Merthyr, a Rice Williams a William Davies, Rymni, ei gynghorwyr, i gyfansoddi cynglor i drefnu pob materion tymmorol ac ysbrydol. Fel hyn y rhag-barotoisom drwy gydsyniad dieithriad.

Ar ddydd Llun, y 26ain o Chwefror, oddeutu dau o'r gloch prydawn, hwyliasom o'r porthladd, a chanodd yr holl Saint, yn nghyda'r delyn, "Ffarwel y Saint" wrth fyned o'r dock. Eu lleisiau peraidd a adle'sient drwy'r ddinas, nes dwyn sylw a pheri syndod i filoedd o edrychwyr, y rhai a'n dilynent ar hyd y lân fel pe wedi eu swyno. Hyd yma dilynwyd ni gan ein hanwyl a'n ffyddlawn frodyr, William Phillips, Merthyr, Abel Evans, Eliaser Edwards, ac amryw henuriaid ffyddlawn ereill, ynghyd â David Jeremy o Brechfa. Y brodyr hyn, wedi dangos pob caredigrwydd arall a allent, a phob cynnorthwy, fel anwyl garedigion eu hanwyliaid hyd lân y bedd, a eiddigeddent am y mwyaf am ddangos etto ychwaneg o'n cariad, drwy brynu oranges, a'u taflu atom i'r llong, hyd y gallent ei chyrhaedd. Cwmpiad yr oranges i'r môr cyn ein cyrhaedd, a brofodd ein bod yn rhy bell i siglo dwylaw â'n gilydd mwy. Yr ysgariad olaf hwn â hwy, yn unig a allodd gynhyrfu ffynnonell y dagrau erbyn ein gwaethaf. Erbyn hyn, braidd yn ddarwybod, yr oll a welom o'n hol oedd eu nap-cynau, fel baneri yn chwifio yn yr awel, mewn iaith yn uchelfoeddio o galon gur, "Yn iach, yn iach! i forio yr eigion mawr i Seion hoff;" tra yr oll a glywent hwy yn ol oedd adleisiad calonau cynhes yn dod gyda'r awel oddiar y dwr, "Yn iach, yn iach! Brydeinig dir," &c. Meddylieim fod, nid yn unig dynion estronol, ond holl natur hefyd, wedi ymlonyddu i syllu ar yr olygfa, a gwyntoedd Chwefror wedi troi yn awelon haf o'n plaid. Dan deimladau annesgrifiadwy, llusgwyd ni gan ddwy agerlong sawr o olag y ddinas; a chy'n y nos ymasiglai ein llong megys bwth ar ymchwydd tonau y môr. Trodd yr agerlongau yn ol ar ol ein hebrwng oddeutu 30 milltir, a chyfnwidiodd yr olygfa yn dufewnol arnom ninnau, Yn awr elai rhai i gynneu tânau, berwi dwfr, gwneyd tê, &c.; tra ereill, mwy prudd eu bron gan glefyd y môr, a ymlwybrent tua'r gwely. Pan ddaeth wyth o'r gloch, a'r llong dan lawn hwyliâu—y gwynt o'r gorllewin, a phob peth mewn trefn hyd y gelliid—cynnalwyd cwrdd gweddi deuluaidd, ac aeth pawb i orwedd, eithr nid nemawr i gysgu; ac er nad oedd y gwynt yn ystormus, na'r môr yn arw, etto yr oedd yn ddigon garw i wneyd braidd bawb mor glaf, fel nad anghosiaf y noson hono yn hir; er na chysgodd neb nemawr, etto neb lai na fy hunau ac ychydig o'r henuriaid ereill, gan ein bod ol a blaen yn cysuro ac yn cynnorthwyo y cleifion hyd y gallem drwy'r nos braidd. Hyfryd oedd goleu haul boreu dranoeth, a gwellhaodd amryw o'r cleifion; eithr ni allent gerdded eu hunain ar draws y deck braidd, heb eu harwain, yr hyn wasanaeth a'm cadwai i yn lled ddiwyd, ond nid llai pleserus na phob arweiniad arall iddynt. Y boreu hwn ymdrechais yn galed cyn llwyddo i gael rhai o'r

cleifion o'r gwely i anadlu awyr iach, gan mor ddifywyd yw y teimlad a grea clefyd y mor. Braidd na ddigiai ambell un wrthys o herwydd fy nhaerni; eithr ni fynwn fy nacâu, serch gorfod cario aml un ar y deck; a chawn dâl da am fy nhrasserth trwy amynedd, wrth ganfod fod yr awyr iach ar lân yn eu gwellhau yn raddol a dieithriad, fel mai hawdd oedd canfod gwahaniaeth rhwng y rhai a ymollyngent i'w teimladau i aros yn eu gwely, a'r lleill a ymwrolent i ddod i'r awyr iachus ar y deck, iachad pa rai, ynghyd â'u tystiolaethau o hyny i ereill, a argyhoeddai ereill i'w hetelychu,—ac nid allaf annog gormod ar y rhai etto a ddel, i wneyd yr oll a allant i fyned ar y deck yn y cyffelyb amgylchiad; ac nid hir y bu, cyn i'r rhai a wrthodent waethaf i ddod gyda mi i'r lân, ddiolch mwyaf i mi, o herwydd i mi braidd eu gorfodi i ddod.—Y dydd hwn, cefais ddigon o'r dynion i ddyfod i “Siop y Cwmpeini” (fel y galwent y store room lle cedwid yr ymborth, yr hwn oedd yn mhen ol y llong); a gwnaeth y tri priflywydd, a'm hunan, siopwyr i bwrpas, i bwysu y gwahanol fwydydd canlynol i bob teulu, megys y dewisent; ac felly gallai pob un ei ddarparu fel a'r pryd y mynai. Rhanwyd i bob un dros 14 mlwydd oed y pwysau a ganlyn, a hanner hyny i bob un oedd dros flwydd a thau 14; sef,—O fara caled, gwyn a da, 10 pwys; siwgr, 4 pwys; caws, 3 phwys; ymenyn, 3 phwys; resin, 4 pwys; rice, 2 bwys; coffi, 2 bwys; triagl, 4 pwys; tê, $\frac{1}{4}$ pwys. Yr ymborth hwn oedd o natur dda rhagorol, ac yn rhodd o eiddo y Llywydd Pratt, a'r hyn ni roddir gan neb ereill i sudolion; ac er mor drist eu gwyn. ebau oedd rhai o'r benywod, etto parai yr olygfa ar y fath rodd iddynt ymlwybro tua'r siop yn siriol; a thra y sathrai y naill droed ar y llall, ac weithiau cwympai y naill ar y llall, gan ysgyd. wad y llong, etto meddaf, galwent am gymhorth “i godi'r isaf” dan chwerthin, a thrient wedy'n. Nid oedd derbyn wyneb am hyn, ond y goreu ei draed a gadwai ei ben i'r lân, a chydunai pawb fod y naill goes yn rhy fer, nen'r llall yn rhy hir, braidd bob cam.

Yn y prydnewn, gan fod y gwynt yn groes, safodd y llong drosodd ar gyffiniau yr Iwerddon, hyd nes yr oedd ei mynyddau serth a'i chreigiau danneddog yn bygwth ein llarpio, os deum yn nes; a boðdlawn oeddyn oll i'r morwyr droi y llong yr ochr arall i'r gwynt, a'i thrwyn tuag at ororau ein hoff wlad ein hunain. Yr oedd amryw longau mawrion ereill yn ein golwg yn hwylio tua'r gorllewin, eithr yn hollol anhygoel cyflymai ein llong ni heibio iddynt oll o un i un, fel nas gwelem hwynt mwyach. Canol y nos, yr oedd y gwynt yn cynyddu, a ninnau yn agos iawn i oleuadau Pen Gaergybi;—pawb braidd, oddieithr fy hunan a'r brwyd Daniel Daniel, yn glaf.

— 28. Aethym ar y deck gyda thoriad y dydd, a'r cynaf peth a dynodd fy sylw neillduol oedd Ynys Enlli, nid neppell oddi-wrthym; a thu hwnt iddi dyrchafai mynyddau anferth sir Gaernarfon eu penau eiryawg, fel pe am yr uchaf a'r mwyaf awyddus i syllu, ar doriad y wawr, ai byw, ai wedi boddi, y plan a sagwyd ar eu bronau; ai a glywent heddyw ar y weilgi, hoff leisiau eu

meibion ymfudol yn adleisio megys gynt yn nghoedwigoedd a glenydd eu bro. Yn yr ymgyrch awyddus hyn, megys mam hith-aethus yn mblith ei merched, yr Wyddfa hoff uwch creigiau yr Kryri oedd hwyaf ei gwddf, ac nchaf ei phen i'r nef, yn syllu ar ein hîol.—anghofodd, gan ei hawydd, i ddiosg ei chap nos (eiryawg) i'n cylfarch: etto, nid oedd o'i meibion hyn, ond fy hunan, a feddai nerth i adleisio ei llarwel famol yn ol, cyn y gostyngai ei phen hawddgar ar ol ei merched o un i'un yn yr eigion dwyreiniol. Eithr nid arosai fy llestr i'm sereh gofleidio ei gwrthddrych (sef hoff wlad fy nhadau) yn hir, gan ei hawydd fel y milgi i gyflymu ei ffordd dros y berw brigwyn, fel pe yr ymchwareuai ar frigau ei gyuddeiriog donau yn gampus ac eoln. Eithr nid y welgi gwyrdd, er ei gyffroad—yr awyr las, er ei flymigrwydd—nid hyd y nod cysur fy nghyd-deithwyr, nad faint oeddwn am hyni—nac ychwaith y llarwel olaf i ororau'm gwlad,—a lanwai fy meddwl fwyaf; ond meddwl yr wyf yn ddwys am gyflwr ei thrigolion. Gwelwn fy hun yn awr â dyrnaid bach, megys ysgub y cwhwfa, o drigolion Gwalla, o hirbell yn syllu ar y wlad a elwir yn "ardd Crisionogaeth"—yn "wlad y Beiblau," yr hon y dyrchafa penau brigog ei haddoldai lliosog i'r nef, yn gofadaïl o'i sel frwdfrydig; ie, wele hyn, a mwy etto: ac ai ffaith, ynte breuddwyd yw, fy mod ond wedi dianc ar y dŵfr o blith fy mrodyr unwaed, â'm bywyd a chroen fy nannedd? Os ie, pahan hyn? Os nage, pahan yr holl erlid, y difenwi, a'r cam gyhuddiadau a oddefais am flyneddau o'r wasg a'r pwlpodau? Pahan gorfod gwyllied fy annedd am wythnosau? Pahan niad diogel fy einioes, ond rhwng gwylywyr? Pahan gorfod ffoi yn ddirgel cyn yr amser? Pahan na chawn llarwelio â'm hanwyl wrig a'm baban? Diau nad â'm drosedd yn y byd; canys un, dwy, i'ie, mwy na theirgwaith yr heriais undyn i brofi trosedd i'm herbyn. O, rhaid addef, nis gellir celu, mai erlidigaeth grefyddol a barodd yr oll; rhaid fod prym yn fy nghrefydd, pe bai dim arall i'w phrofi na hyn, ei bod wedi gallu cynhyrfu hen nwyd pob gau grefydd i'w herlid: nid o Dduw y tardda erlid, ac nid o hono ef y tardda y grefydd a erlidia * * *. O, ie, ffaith yw hyn, mai megys alltud o ororau'm gwlad y gwewrfa yr huan yn siriol ar fy mben—megys alltud am ei grefydd y ceisia y gwyntoedd fy nghuro yn ol—fel alltud, gan ei frodyr a geisia lesoli, ymnertha fy llestr hoff, fy nghastell, i'm hamddiffyn rhag peryglon, ac i ledi ei hwyliau i'r gwynt i'm cludo, fel ei char, i Seion gartrefol yn ddiangol, megys milwr gorchfygol i'w artref. Y meddyliau hyn, yn ddiarwybod, a sugnodd fy serch a'm golygon tua'r gorllewin, i fytyrio ar Seion a'i gogoniant, hyd nes drachefn, fel llrwd lifeinol, y daeth i'm cof, fod o'i phlant anwyl filoedd ar ol yn Nghymru—fod o'm cydgenedl hynaws ynio luoedd a garent wir grefydd, pe caent gyfle. Troais unwaith etto fy wneb i'r dwyrain, a'm hysbryd mewn gweddi ar i'r Duw a ddechreuodd y gwaith da hwn, ac a lwyddodd ei efengyl yn Nghymru, i wneyd ei weision yn rymus wyr, a hoff, fel meibion taran sawr, i'w hudganu yn uwch, nes deffro trigolion bro; a bryn o gysgadtwydd gau-grefyddol, i'w chofleidio;—ar fod ei Ysbryd Ef, fel

parawl dân, yn coethi ei hufyddion. Ond erbyn hyn, rhwng
 cwrlid glâs yr awyr, ac nebel frig y tônuau, braidd na chuddient yr
 ardd fach lân, sef y wlad a'm magodd, dan eu gorchudd. Addun-
 edais na byddwn ddig am ddrwg a gefais yno, na! allud bythol
 wyf, ond etto dros y dyfnder dof i dy fy ngharedigion, i dreio, os
 oes modd, en dwyn yn fy nghol i Seion wiw mawn pryd. O, fy
 ngwlad! fy serch a gylma am dy froydd hardd; dy lánau
 creigaidd ydynt "faen tynfa" oll; canys caraf les dy bebloedd.
 Efengyl nef ddvrrhafo ei baneri gwynion ar bob bryn ac ael o
 fewn dy dir, a chwifio yn dy holl awelon. Ond etto, y mae o fewn
 dy dir, tu hwnt i'r oll a nodais, vn dra goruwch, tra hoff, a theg,
 ac er mor bell yn awr, yn nes na'r oll i'm calon! O, fy meddwl,
 paid, tyred, dychwel yn ol; paham y toraf linyrau calon? Beth
 wnaf vn galw? yn ol ni ddaw. Wel, ynte, am eiliad, dy aden
 cwyd i'r gwynt, a gwledda yn ei chwmpeni. Yn awr engel nef
 o gylch ei gwely svdd, yn siô iddi gysgu; ei grudd yn goch, a'i
 gwen yn llon, fel pe y'm gwelai; estyna ei breichiau glân; cof-
 leidia yn dŷn, fel pe bai ei hanwyl arglwydd yn ei chol; eithr nid
 yw ef yno, ond ei ddellw. O'r rhosyn bach, a'r nnig un, braidd
 cyhyd ei oes â'r newydd loer, paham y'th adewais? Hyd y boreu
 hwn, fy anwyl,* er it' y'm dilyn dros fôr a thir, a gwledydd
 lawer—er cydfwynhau yn llon o'm mynweſ gur a chysuron—er
 aml waith i ti wneyd i'm anghosio byd a'i bethau, ac er mor dŷn
 y cedwaist ti allweddau'm calon am ddeg o flwyddi—er pawb a
 phob peth fu erioed hyd boreu heddyw, nes saethai'm meddwl
 az dori'r wawr i'th ystafell wely, y cerais. O, na chai fy meddwl
 aros yma yn hwy, i.e, aros i ti dleffroi? ond galw digon dwys
 oedd ymadael gynt—paham ei ail archolli? Ymwrola'm hysbryd;
 rhaid yw hyn er crefydd Crist—nid yw yn hir, ac nid yw yr ysgar-
 iad hwn heb ei wobwr oesol. Chwi, engyl glân, gorchymynaf i
 chwi ofal fy ngwraig a'm baban; yn mlaen yn wrol af,—zofalweh
 am ei chynnal, hyd nes dychwelaf; gwerthfawr yw i'm henaid i,
 canys er fy mwyn boddlonodd; am hyny, neidia'r Wyddfa fawr
 i'r môr, cyn byth byth ei hanghofiaf;—i'th freichiau di, fy Nhad,
 cyflwynaf fi yr oll a feddaf. Un golwg etto—un cyfarchiad mwy
 cyn ymadawaf; ymgryma'm hysbryd uwch ei gorweddle: yn awr
 ymnertha i'r campwaith hwn! Ust! beth sy'n bod? p'le yr wyf?
 aie, ai ar yr eigion mawr? i.e, a galwad ar frys at y cleision. Wel,
 wel, crwydrais yn mhell; ond dychwelaf at fy stori. Nid oedd
 nemawr yn alluog i ddarparu byyd heddyw; ond cytunodd Dan-
 iel Daniel a William Jenkins, a minnau, ar ddyfais i ddenu, drwy
 helpu amryw ar y deck; gwnaethom le cysurus i restr o'r benyw-
 od i eistedd yn yr awyr, ac ymroisom i wneyd gruel blawd ceirch
 iddynt, yr hyn a'u nerthodd yn fawr; ac felly, crochaned ar ol
 crochaned a ranasom iddynt ar gylch, ar yr ammod o'u bod yn
 aros i fyny i'w fwyta. Anhawdd darlunio y lles oedd hyn iddynt;
 a chynghorwn bawb i ddyfod â digonedd o flawd ceirch da, a bara

* Fel y sylwyd yn yr UDGORN yn ddiweddar, gwellhaodd Mrs. Jones mor
 gysym, fel y gallodd fyned ar ol ei hanwyl briod, yr hwn mae yn ddigon
 tebyg, sydd wedi ei gwled yn Council Bluffs erbyn hyn.—J. D.

ceirch, gyda hwynt, o herwydd cânt weled mai hyny a fydd oreu ei flas o bob peth ganddynt am yspaid.

Yn yr hwyr, yr oedd yr Iwerddon yn ein golwg; cynnyddodd y gwynt, fel y gorsfuwyd lleihau y top sails i'r man eithaf, a thynu yr hwyliau ereill oll i mewn. Trowyd y llong a'i phen i'r deau am yspaid, ac yna yn ol ar y naill ochr drwy'r nos; ac ar y naill ochr, mwy na'r llall, yn ei byw nis gallasai orwedd yn llonydd, na gadael i neb arall orwedd na sefyll yn ei unfan; eithr fel drws ar ei golyn, ysgydwai y gôrweiddwyr yn ddibaid; ond am y gwyr traed, hi a'u lluchiai hwynt, yn nghyda'u boxes a'u llestri, draws y llawr, mor ddibris a diryhydd ag y tafla march gwyllt ei farchlog anfedrus dros y clawdd, ac a'i gadawai yno; eithr hon, yn ddi-serch ddigon. pan y codai, a'i gyrai yn ol i rywle, nes yr yngropiai gartref. Nid oedd gwiw ei herchi i beidio; ceintach y naill, na griddsfâu y llall, yn nghyda lleisiau y plant, oll a gaent yr un effaith arni, sef i gynnyddu ei meddwdod; a chytunodd llawer â fy hunan cyn y boreu, mai gwell oedd gadael iddi gael ei ffordd ei hun; ynsigled nes y blino, ac felly y bu. Nid yw hi braidd wedi peidio etto.

Mawrth 1. Am ran fawr o'r dydd, buom yn rhedeg am y cyflyma gyda chlochdy Dewi Sant, sir Benfro; ond cyn y nos, cawsom ei flaen, o herwydd i'r gwynt ein helpu. Erbyn hyn, yr oedd llawer, yn enwedig o'r dynion, wedi ymwroli, nes, serch cwmpo-fawr tro, fel y baban, wedi dysgu cerdded gyda yr ochrau. Cyn-naliwyd cwrdd gweddio yn yr hwyr, ac yn fuan wed'yn trodd y gwynt yn swy o'n plaid, yr hyn a galonogodd y cleifion yn fawr, Dim ond bara ceirch mewn blas heddyw.

— 2. Yr oeddym allan o olwg tir, a dim ond awyr lân a dwfr gwyrdd o'u hamgylch, oddieithr ambell long a hwylient bawb eu ffordd eu hunan. Y mwyrif yn gwellhau etto yn dda.

— 3. Tywydd yn hyfryd, a'r plant bach yn chwarae hyd y llong, a'r rhieni yn chwerthin wrth weled ambell garn o honynt ar eu gilydd hyd y llawr, ac etto ofn anturio yno i ymyraeth. Hyd heddyw hebryngwyd ni gan adar ein gwlad, eithr nid dim yn mhellach; ond wedi gorchymyn ein gofal i laweroedd o adar y môr, dychwelasant.

— 4 (Sul). Am ddau o'r gloch, cawsom gwrdd Saint hyfryd a rhagorol, a phawb wrth eu hodd, oddieithr ambell un o'r rhai a wrthodasent bob cynghor i ddod ar y deck, pa rai oeddynt erbyn hyn wedi magu twymyn yn eu gwelyau, yr hyn a achosodd i ni gryn ofid a thrafferth, ynghyd a gweddiau taer, cyn eu hadferwyd. Rhybyddiwn ereill i beidio gwneyd yr un modd. Rhoddwyd llawer o gynghorion llesol a dyddorol yn y cwrdd; ac ar ol y sacrament, tystiolaethodd amryw am ddaioni Duw, &c. Cleifion yn gwella. Yn y nos dosparthwyd y Saint yn ddau gwrdd gweddi, y naill hanner yn mhob pen i'r llong. Y gwynt a'n pleidiodd yn ddymunol.

— 5. Tywydd yn hyfryd drwy'r dydd; ymlwybro i'r deck yn gysson iawn; y cerddorion yn canu gydag unarddeg o offerynau cerdd, a phawb ond rhai cleifion yn weddol gysurus.

— 6. Braidd yn annysgwyliadwy i neb o honom, bu farw eis o banwyl chwaer, gwraig i'r brawd Hugh Davies o Llynlleifiad, yr dros 60 mlwydd oed, ac yn wael iawn ei hiechyd pan y daeth i'r llong, fel braidd y dysgwyliasai gyrhaedd dros y môr, er hynny ei dewisiad oedd dyfod gyda ei theulu. Ymddygodd cadben a swyddwyr y llong yn garedig iawn yn egwyneb yr amgylchiad, a theimlai pawb drwy'r llong mai i'ŷ galar yw ein hannedd heddyw. Cadwyd cwrdd gweddi yn yr hwyr, a phawb yn well eu hiechyd; effeithiodd y farwolaeth i beri i ereill a wrthodasant godi o'u gwelyau hyd yn hyn, a'r canlyniad fu iddynt wella.

— 7. Yr hin yn hyfryd, a'r gwynt yn deg, y llong yn hwylio tua 7 milltir yr awr. Darparwyd i gyflwyno corff ein chwaer i w dyfrllyd fedd; pregethais ei phregeth angladdol am ddau o'r goch, ar y testun, "Pa fodd y cyfodir y meirw, ac â pha ryw gorff y deuant?"—(Paul.) Atebais y cwestiwn oiaf yn fyr, ond dilynwyd yr atebiad i'r cwestiwn arall yn mlaen am amryw Solian; ac nid yw wedi ei gwbl ateb etto! Ar ol y bregth, rhoddwyd yr arch ar astell sawr, stopwyd y llong, ac ar ol i'r Saint ganu hymn, y morwyr a godasant y pen mewnol i'r astell, nes y disgynodd yr arch oddiar y pen arall i'r dyfnor hallt, yr hwn trwy rym y ceryg a roddiasid yn yr arch i'w suddo, a ymagorodd i lyncu ei drysor drud, ac i'w gadw yn ddiofel hyd y dydd ag y gorchymynir i'r "môr roi i syny y meirw sydd ynddo." Mae i'w bbiaeth apghywir iawn gan rai, ac yn peri ârswyd arnynt wrth feddwl am gael eu claddu yn y môr. Meddytia rhai y byddant yn nofio ar y wyneb, ac yn ysgyiaeth i bysgod; ac hyd y nod pe felly, pa waeth hynny na phydru yn y graiau oer, a bod yn ymboeth i chiwlanoed bedd; eithr, nid yw y pysgod yn cael y rhai a gleddir yn y môr, o herwydd dyben rhoddi y pwysau gyla y corff yw, fel y suddo i lawr yn gyflym yn is i'r eigion nag yr el pysgod byth, ac yn is nag y gallant fyw, ac yno y nofia mewn heli llongydd, yr hwn a'i cadwa rhag dalansoddi na phydru yn oesol; ie, yn llawer gwell cedwir hwy hyd ddydd eu cyrchiad, pan "y berwa y môr," nag y cedwid y goreu o'r Aifftiaid drwy eubalmio. Yr ystyriaeth hon a ddilea y gwrthdarawiaid sydd yn y meddwl i gladdu yn y môr, ac a'i gwna yn hytraeth yn ddewisol. Hefyd, meddyliaf mai dyma oedd yn ngolwg yr apostol, pan y dywed y dery y môr ei feirw allan, nid yn fyw, debygaif, ond y corff a gladdwyd ynddo, ac a gadwyd yn y dull hwn; nac i fod byth yn fyw; canys "y corff a heuir, nid hwnw a fydd," serch ei han yn y môr neu dir, ond corff anllygredig a hunanieithir a'r ysbryd a feddai gorff o'r blaen. Wedi i'r môr gau ei safn am ei daonid, a'n llong iach sefyll i ni allu syllu ar yr olygfa fawreddig hon am ychydig synydau, llanwodd ei hwyliau ag awelon, a charlamai dros y tonau fel pe na buasai dim wedi dygwydd. Parbaodd y gwynt o'n plaid, a phob peth yn gysurus, ar holl gleision wedi gwella, a phawb yn bwyta ei allowance drwy yr wythnos hon. Cadwyd cwrdd gweddi a chynghori bob nos.

— 11 (Sul). Y gwynt yn ysgafn ac i'n herbyn; y môr yn dawel, a phob un wedi ymlanhau erbyn y cwrdd, yr hwn a ddech-

reunodd am ddau o'r gloch, ac a barhaodd hyd bump o'r gloch; buom am dros ddwy awr yn ceisio ateb y cwestiwn blaenorol, sef, "Pa fodd y cyfodir y meirw?" a gohiriwyd ef hyd y cwrdd nesaf. Ymddangosai pawb wrth eu bodd, ac yn gorfoleddu yn y ddysgeidiaeth. Cyn diwedd y cwrdd trodd y gwynt yn nerthol o'n plaid, yn ol ein gweddïau, yr hwn gan mwyaf a barhaodd o'n plaid drwy yr wythnos; weithiau chwythai ni dros 10 milltir yn yr awr. Teimlem y gwynt a'r hinsawdd, erbyn hyn, yn gwresogi yn raddol, gan ein bod wedi hwylio o hyd i'r de-orllewin; dechreuai amryw gwyno fod eu dilladau gwlanen yn rhy drwm, ac nid hir y buont yn oddefol. Gwell pe buasai gan bawb ychwaneg o ddillad ysgafn. Ni chawsom nemawr wlaw, oddieithr ychydig gawodydd; ac nid gwlawio yr oedd pryd hyny, ond tywallt dwfr i lawr o'r cymylau. Gwelsom, weithiau, amryw wahanol fathau o bysgod, rhai mawrion iawn, ereill llai, ac yn neidio o'r dwfr. Helpai hyn y diogwyr i ddyfod i'r deck, yr hyn a'u gwellhâi bob anadliad.

— 16. Bu y gwynt yn groes iawn i ni yn y prydawn. Galwyd cwrdd gweddi am saith, i weddio am wynt teg. Ar ol y cwrdd, dywedais wrth rai oedd ar fy mhws, y teimlwn awydd arnaf synd ar y deck, a pheidio dychwelyd hyd nes y rhoddai ein Tad wynt teg i ni. Tra yn myned, a'm troed wedi sengu ar ris isaf yr ysgol, cyfarchodd rhai gerflaw fyf am y naill beth a'r llall, a gofynodd un beth a ewyllysiwn fwyaf? Atebais, mai clywed y mate ar y deck yn bloeddio, "*Haul in the weather braces*;"* a chyn i mi syfild fy nhroed o'r man lle yr oedd, clywn i, a'r lleill a'm clywsent yn dymuno hyny, y mate uwch ein penau yn bloeddio yn uchel, "*Haul in the weather braces*," i.e., air am air megys y dywedais; ac wele wynt teg yn nerthol chwythu o'n plaid, yr hwn mewn ychydig ddyddïau a'n gyrodd tua mil o filltiroedd tuag adref, sef tua Seion. Mawr y diolchem i'n Duw am dano.

— 17 (Sul). Tywydd yn hyfryd, a phawb yn gysurus. Prydnawn, cawsom gwrdd Saint rhagorol; ychwaneg am "Pa fodd y cyfodir y meirw?" Cwrdd yn yr hwyr. Gwynt teg, a hin mor hyfryd drwy yr wythnos braidd ag sydd yn Nghymru yn mis Mehefin. Ambell *squall* a chwmwl yn tori i'n diwallu â dwfr gwlaw i olchi. Hyfryd yw gweled y plant yn chwarae hyd y deck, ac yn difyrn eu rhieni; rhai yn canu yma, ereill yn chwedl-eua, neu yn darllen draw; rhai yn cerdded fraich yn mraich, tra ereill yn darparu bwydydd o gynifer fathau braidd ag a geir mewn unrhyw cookshop. Gwnai y cerddorion eu goreu i harddu y drych, a'r delyn bithau â'i lleisiau mwyn yu unig yr hwyr a'n difyrai wrth ganu ffarwel i frenin y dydd, pan y gostyngai ei ben coch yn yr eigion gorllewinol. I oleuo yr olygfa yn ei le, defroai Phebus fwyn o'i chwsg, fel pe cenfigenai wrtho. Nid rhyfedd ddarlod i olygfeydd llai hynod na hyn gynhyrfu sodlau Dafydd gynt, nes yn y deml iddo ddiosg ei wisg—i ba beth? Ust! a gawn ni ateb? Beth dal celu, oni wnaeth ef hyny i ddawnsio! Do, do; ac ni chawsai nemawr o'n plith ni, ond ambell sectariad

* Gorchymyn i dydd yn y rhaffau a osodant yr hwyllau ar draws y lloug-
au yn dynodi gwynt teg yn ddieithriad.

sychlyd, a'r na fuasai cyn hawdded ganddynt ei efelychu ef yn hyn, a beio arno. O'r hyn lleiaf, anhawdd gwadu a'r nad felly y bu yma ar brydian, heb achosi storon ychwaith. "Siop y cwmpeini" yn agored i ranu allan, heb lyfrau nac arian, ddigonedd o naill ai ffa gwynion, rice, blawd gwenith, blawd ceirch, cig moch, neu rywbeth arall, a phawb eu gwala o hono. Rhai yn cwyno rhag anwyd, trwy wlychu yn y gwlaw.

— 25 (Sul). Awelon ysgafn o wynt ar brydian; dro arall yr olygfa o'n hamgylch "megys môr tawel o wydr;" ac nid yn unig yr elfenau, ond ein llong a'i phlant oll, yn cadw y Sabboth sant-aidd hwn yn orphwysfa lonydd; eithr syllai yr haul yn rhy graff ar rai, hyd nes da oedd cael cilio o'i wyddfod i rywle. Cwrdd Saint prydawn, a darlith ar "Pa fodd y cyfodir y meirw." Pregeth Saesneg ar y deck yn yr hwyr, a'r morwyr oll braidd yn canmawl yr athrawiaeth. Cododd y gwynt yn nerthol o'n plaid yn y nos. Nemawr neillduol olygfa yr wythnos hon a'r a nodwyd, oddieithr ambell groes awel, yr hyn a gyfnewidiai braidd yn gysson ar ganol neu ddiwedd ein cwrdd gweddi, yr hyn a gynnelid bob nos; neu ambell ymweliad pysgod i'n difyru, neu long yma a thraw o bell, a lonent yr olygfa unig. Y gelyn diafol, yntau hefyd, a gyd-honai ei hawl â Neptune (duw y môr) i gydforio â ni, er nad mor felys ei gwmpeini; etto, gwaith anhawdd oedd ei gael dros y bwrdd, o herwydd ei gyfrwysdra; ac nid anfynych, mewn caledi, y troai ei hun yn angel goleuni, ac felly llechai yn llogell ambell swyddwr. O baw a adawer ar ol yn Babilon, bydded hwn yr olaf! Morwr gwael, terfysgwr yw; ac arweinydd gwaeth nag Ahitophel. Nid i'r moch—nid i'r môr, ond i rai o'r Babiloniaid, y diangai weithiau; a'r tro nesaf y croesaf fi y môr â llwyth o Saint tua Seion, caiff y ddau rywogaeth arall aros adref! Teimlid lles mawr trwy yfed ac ymdrochi yn nwfr y mor yn y boreu. Gwnaed pawb felly â'u plant, goxeu po amlaf. Gofaled pawb i beidio hongian dim i rwystro i'r awyr fyned drwy y llong; hefyd, edryched pawb na byddont eu hunain, na'u plant, yn rhwym eu corff,—cymmerer meddyginiaeth. O herwydd yr esgeulusdod hwn, dyoddefodd amryw nes myned braidd yn anfeddyginiaethol. Na fwytaer cymmaint o fwyd cryf ychwaith, canys nid yw y segurfyd hwn yn ei dreulio. Yn anad pob peth gwerthfawr arall a ddyger i'r mor, nac anghofier dod â llawnder mawr o *amynedd*; bydd treuliad mawr ar y stor hon, gofaler na ddiffigio. Gwerthfawrocach hefyd nag aur lawer, yw gronyn bach o wir ffydd ar y mor, canys pryna hono wynt teg a phob peth anghenrheidiol. Ond er pob peth fu, ni chlywais neb yn edifarhau am gychwyn, ond yn awyddus am gyrhaedd i Seion. Pleser mawr oedd genyf glywed pawb braidd, ol a blaen, yn canmawl daioni Duw tuag atom,—y tywydd teg, yr awelon hyfryd, yr ymborth rhagorol, a'r ffyniant cyffredinol, a gaem yn well na'u dysgwiliad cyn cychwyn. Ac yn wir, nid difyrweh gwael oedd gweled y cogyddesau oddeutu y tân yn gwneyd eu puddings, eu pancakes, a'u fries, yn bentyrau, ac yn gwahoddi y naill y llall i yfed tã gyda eu gilydd; ac yn yr hwyr, "codent i fyny" yn

"Hawen, fel y rhai hyny gynt—"i ddawnsio." Fel hyn aeth a daeth anil ddiwrnod hyfryd ar y cefnfor. Pwy a'u beia?

Ebrill 1 (Sul). Y Sabboth hwn etto, cytunai holl natur â ni etto i ymlonyddu i syllu ar ardderchogrwydd creadigaeth ein Duw. Dwy long ereill a'n hefelychai, er yn iwbell. Cwrdd Saint hyfryd iawn; darlith, am ddwy awr, ar "Pa fodd y cyfodir y meirw?" Amryw rai yn gadael heibio eu holl ddillad gwlanen, fel fy hunan, ac yn cael anwyd. Gofaler rhag hyn; etto, hyfryd yw dillad haf yn awr, ond gwell ymgospi meddai'm dyoddefiadau i; canys yn yr hinsawdd hyn, yn ddisymmwth rhwyga y cymylau dan bwysau eu beichiau dyflog; yn enwedig na adawer dillad gwlyb am danoch. Ganol dydd heddyw, yr oedd ein hamser ni yma bedair awr ar ol amser Llundain; sef, pan yn ddeuddeg o'r gloch neu ganol y dydd yma, yr oedd yn bedwar o'r gloch prydawn yn Llundain, yr hyn a brofai ein bod ni 60 o raddau i'r gorllewin o Llundain, a chennym 30 gradd. 9 mynyd yn orllewinol i'w rhedeg etto cyn cyrhaedd New Orleans. Syllais ar yr haul heddyw etto drwy y sextant, a chefais ein lledred yn 23 gradd 54 mynyd yn ogleddol, neu o fewn 14 o filltiroedd i'r tropics, pa le yn nghanol yr haf, y buasai yr haul uwch ein penau; eithr, gan ei fod yn y deau yn awr, ac awelon hyfryd yn tymheru yr hin, ni theimlem wres annyoddefol. Ein pellder o New Orleans heddyw yw tua 2000 o filltiroedd. Ein pellder oddiwrth y tir a ddysgwylwn weled ar ein taith, sef "Hole in the Wall," un o ynysoedd y Bahamas, sydd o naw cant i fil o filltiroedd. Ein pellder deheuol o Lynlleifiad yw 1806 o filltiroedd.

—2. Cawsom amryw stormydd a gwlawogydd, a chroes-wynt-oedd geirwon o amryw fanau, a fwythiai lyncu ein cragen fach i eigion y crochan hallt; er hyny oll, drwy noddod ein Duw, a medrusrwydd ein cadben a'i forwyr, dringai ein llong i'r lân o don i don, fel yr ehedai y wenol drwy yr awel denen. Pan ganfu y mor a'i uthr, egr donau, na throai ein llestr fach yn ol, er ei siglo hi a'r oll oedd ynddi, fel y gwna y corwynt â nyth y fran ar frig y dderwen, ac na allai siglo un o'r cywion bach o honi—newidiodd ei wedd, ac a wenodd yn fwyn; yr haul, yr hwn gynt a wisgodd sachlen flew yn ddigofus ei hyldrem, o hug i hug a ddiosgodd ei wisg, ac a chwarddodd am ben y gyflafan, gan addaw yn deg wrth ostwng ei ben mewn wybr goch, y caem noson ffein i gyngu heno;—am yr hyn, diolchai pawb, a gwnaent yn fawr o honi. Efallai mai anhygoel gan yr anwybodus fydd y dywedriad nesaf, ond y mae yn ddigon gwir, serch hyny, ein bod ni braidd bob dydd bellach yn gweled pysgod yn ehedeg! weithiau gwelwn ugeiniau o honynt gyda eu gilydd. Ehedant weithiau gryn filltir neu ychwaneg, ac yna gwlychant eu besgyll yn mrig y don, ac ymaith â hwy eilwaith. Erlidir hwy gan bysgod ereill, pa rai a neidiant o'r dwfr ar eu hol am ryw droedfeddi o'r dwfr; da i'r gwanaf pryd hyn fod y Creawdwr wedi trefnu iddo adenydd i'w waredu. Nid yw y pysgod hyn yn ehedeg yn uchel iawn, er yn uwch pan fo y gwynt yn gryf na phan fydd yn dawel. Ar brydiau ereill, yn y cylchoedd hyn, gwelais hwynt yn ehedeg yn erbyn

hwyliau y llong, ac yn cwympo ar y deck; a chan na allant godi ond o'r dwfr, daliem hwynt. Nid ydynt gynmaint â mackerel yn gyffredin. Eu hadenydd ydynt, nid o blu, ond math o groen dysclær a theneu iawn; caua yn y dwfr i ateb yr un dyben ag esgvl; eu hyd ydynt o 6 hyd 10 modfedd. Ni allant eliedeg yn hwy nag y parha eu hadenydd yn wlybion, ac nid ydynt i'w gweled ond mewn hinsawdd twynn.

Yn awr y mae Mrs. Williams, gynt o Ynysybont, wedi bod yn glaf o dwymyn am amryw ddyddiau, yn gwellhan yn raddol. Jane Morgans o Gaerdyf, yr hon oedd wedi dyoddef doluriau poenus ar ei choesau ar brydiau er ys naw mlynedd, ac wedi cael ei hystyried yn hollol anfeddyginiaetbol gan feddygon, yn gwaethygu: y mae hi wedi digaloni yn arferyd yr ordinhad eglwysig, a'i ffydd ynddi wedi diffygio. Yr ydym, er pan y daethom i dywydd twyn, bob dosparth yn ei ddydd ar gylch, yn taenu eu gwelyau, a'u dillad gwelyau, &c., yn yr haul ar y deck, yr hyn sydd yn iechyd mawr i bawb. Gwnaed pawb felly, goreu po fwyaf. Ein eadben, yn dirion, a roes i ni fath o wlybwr i'w daenellu ar hyd ein gorwedd-leoedd, &c., yr hwn a bura yr awyr yn rhyfeddol, a'r hwn a ddefnyddiem yn aml. Mae genym amryw hen bobl yn y llong, ac y maent oll yn gwella, fel y deuant i'r deck bob dydd hyfryd. Un hen wr, yn agos i gant oed, a ddywed yn siriol ei fod yn fwy hapus nag erioed,—fod llawer o'r sectariaid yn Nghymru, ac hyd y nod yn Llynlleifiad, bu y Parch. H. Rees a pheirch. ereill, yn ceisio ei ddigaloni i beidio dyfod, ac yn prophwydo na chythaeddai dros y mor, a llawer o bethau ereill; "ond yr wyf fi," ebe efe, "yn penderfynu, drwy nerth Duw, eu profi hwy oll yn gau brophwydi." Yr oedd efe wedi colli ei wallt, oddieithr ychydig o wallt gwyn fel yr eira; ond erbyn hyn y mae ganddo gnowd toreithiog o wallt newydd fel gwallt plentyn, a dywedai ei fod yn teimlo yn ieuengach o hyd! Gwynt yn deg a hyfryd. Dydd Sadwrn, y 7fed, yr oeddwn i wedi bod i fyny drwy y nos, ac yn edrych am dir hyd 4 o'r gloch y boreu; ac nid oeddwn wedi braidd cysgu cyn i'r fonllef fawr a'i dylanwadau cyffions ar bawb ereill, sef, 'Land a-head' (tir o'n blaen), fy neffro. Mawr y llawenydd a barodd hyn i'r holl fudolion; nid oedd son am, na sylw o ddim arall am yspaid, ond y tir. Erbyn codiad haul, yr oeddym yn hwyllo yn hyfryd i'r deau, ar hyd glanau ynys Abaco, un o'r Bahamas. Ynys lled anial yw hon, ac a boblogir gan bysgotwyr gan mwyaf, neu bobl yn tori coed tanwydd i'w cludo i barthau ereill i'w gwerthu Ymlidia daargrynfau bawb oddi yma weithiau, a gwna alanastra mawr. Dim dymunol iawn yr olwg arni. Naw o'r gloch y boreu, troisom y llong i'r gorllewin i amgylchu y cwr deheuol i'r ynys, oddifeu'n tair milltir neu lai i'r tir. Ar y pwynt deheuol hwn y mae goleudy ar graig, a thŷ annedd ar ei bwys, yn yr hwn y triga ceidwaid y goleudy. Y mae tair o longau ereill yn cyd-hwyllo â ni heibio i ldo, eithr yn dala yn fwy deheuol tua Cuba. Erbyn canol dydd, gadawsom yr ynys hon o'r golwg ar ein hol, ac yr oedd amryw ynysoedd a chreigiau ereill ar y deau i ni, llai na deng milltir.

oddi wrthym. Dylaswn hysbysu i ystyriaeth y lleill etto a ddaw ffordd hyn, gan y deuant yn agos i'r goleu-dy a nodwyd, mai ei enw yw *Hole in the Wall*, ac fel y cofio y sawl a syllo, llygaid pwy fu yn edrych arno o'u blaen. Galwaf sylw at yr ystyr o'r gair, neu y tarddiad o hono; sef, Cewch weled twll mawr drwy greigiau uchel ar y twyn creigog lle y mae y goleu dy. Ymddangosai fel pont neu *arch* fawr o waith celfyddydol, eithr naill ai naturiaeth neu ymfrwydriad yr elfenau a'i gwnaeth. Yr oedd gynt bont arall hynotach, yn cyrhaedd o ben un graig i'r graig gron arall ag sydd yn awr yn unig, a thua 300 o latheni i'r mor oddiwrthi. Lle peryglaf i'w forio o'r holl fyd yr ystyrir y cylchoedd hyn; o herwydd amgylchynir ni am amryw gannoedd o filltiroedd, gan greigiau, rhai arwynebol, rhai tanwynebol, yoyoedd, a thywodydd. Gwelwn amryw longau bach yn pysgota, ac amryw longau bach ereill a elwir yn "wreckers," sef y rhai sydd yn gwybod am y moroedd, ydynt yn hwylio oddi amgylch yn barhaus, gan ymddibynu am fywioliaeth ar anffodau llongau ereill. Pan y bo llongau wedi colli eu ffordd, arweinir y rhai hyn hwynt i'r ffordd iawn, ac achubant lawer o fywydau. Pe bai hyn yr oll a wnelant, da fyddai eu gwaith; eithr cyhuddir hwy o hudo llongau drwy gan-arwyddion o'u ffordd, er mwyn cael miloedd o ddolars am eu harwain allan o berygl yn ol. Rhaid fod llaweroedd o longau yn colli y ffordd hyn, cyn y cynnelid cynnifer o honynt oddi amgylch i ni yn awr; ond nid oes anghen am eu cynorthwy, a gobeithiaf na bydd ychwaith. Machlud haul, cafwyd gwaelod o fewn ugain gwrhyd o ddwfr. Moriwyd yn hwylllog a gofalus drwy y nos, a dygodd ein Harweinydd ni yn ddiogel i weled goleu dydd Sul etto, a Sul y Pasc oedd hwnw; ac er na feddai nemawr rhyw lawer o ddillad newydd i'w gwisgo heddyw, gwelem lawer o bethan newydd a rhyfedd o'n hamgylch. Gwelem oleudy ar ynys arall, ac amryw Ffrancod yn byw ar y lân, wedi adeiladu eu tai, neu yn hytrach eu cabanod tywyrch a disyml yr olwg, ar lân y mor. Hwylion yn awr i'r deau ar hyd ochr y Grand Bahama Bank. Gwynt hyfryd o'r de ddwyrain; llong yn mynyd chwech milltir yn yr awr drwy'r dwfr, heblaw fod y dwfr yn rhedeg gyda ni o dair i bedair milltir yr awr. Nid yw y current dehenol hwn onid llai na milltir o led, oddi allan, neu i'r gogledd i'r hwn mae'r Gulf Stream" yn rhedeg, yn hollol groes i'r arllwysiad hwn. Yma cawn waelod mewn dwfr gwyrdd, mewn o bump i ugain gwrhyd, a'r dwfr yn oer; pan ar y llaw ddeheu i ni, ychydig latheni, y mae lliw y dwfr yn ddu, ei rediad yn hollol groes, ac yn dwymnach o lawer. Gwelem ar lanau y creigiau weddillion o long ddrylliadau. Amryw "wreckers" yn cyd hwylio â ni. Pawb wrth eu bodd yn syllu ar y tir, ac yn neillduol wrth ein bodd ni yn ei adael mor gyflym ar ein bol, ac yn tynu tua phen ein mordaith. Nid yw ynys Cuba neppell oddiwrthym i'r deau, ac y mae prophwydoliaeth ddwl a ffaidd "Seren Gomer,"*

* A gyfeiliornid pe haerid mai y Parch. H. W. Jones, cyhoeddwy y *Seren*, yw y gan-brophwyd uchod. fu yn ysgrifenu dan yr enw "Anti Flambog" yn *Seren Gomer*, Hyd., 1848 f—J. D.

y caffai y Saint eu gwerthu yn gaethion yma, yn destun gwawd rhwng pob dau hyd y deck braidd. Mae y gobedydd hwnw wedi anfarwoli ei ffolineb â chwaeth aflan, a dwyn Cuba i fwy o sylw na dim arall. Ateba ddyben yn awr i adgoffa yn meddyliau y mudolion, y celwyddau a'r camgyhuddiadau a draethwyd ac a gyhoeddwyd arnynt hwy a'u crefydd anwyl, gan eu cydgenedl, nes y dattoda en serch o gwllwm hwy gilydd, hyd y nod oddiwrth wlad eu genedigaeith; ac yn lle meddwl am droi yn ol, symbyla hwy i droi eu gwynebau, nid i'r dwyrain, ond at fachlud haul, am ryddid i addoli Duw, ac am yr iawnderau hynny ag yr amddifadwyd hwynt o honynt gan "Gristionogion selog" eu gwlad eu hun! Ie, gweddi barhaus pawb drwy y llong yw, "Chwyth, ddwyreinwynt, chwyth ni'n chwyrn i'r eigion gorllewinol."

O, hyfryd myfyrio ar yr olygfa hon! Gobaith a lanwa fynwes pawb, fel hwylia y llong gan bwysau yr hyfryd awel. Mawr y diolchiant oll i'w Ceidwad ar y moroedd. Yn Seion, serch hynny, y "maen tynfa" sydd; oddi yno sugnant eu holl gysuron. Eithr ni thal i ni ollwng ein meddyliau mwy, onide rhy faith fydd i'ch colofnau. Af at hanes mwy, a meddylid pob un drosto ei hun; efallai mai hynny fusasai y goreu o'r dechreu.

Anghofiais ddweyd ddarfod i ni gael cwrdd Saint nos Iau ddiweddar, megys y cawsom rai prydiau o'r blaen, ond y tro hwn oedd y cyntaf i ymarferid y doniau, a mawr y cynhwrf a wnaeth hynny ol a blaen y llong, yn mhlith y Babiloniaid! Heident, a swyddwyr y llong oll gyda hwy, at fynedfan ein lle, a chlustfeint mewn syndod. Synem yn sawr beth a achosodd hyn; ond deallasom fod "Achan" yn ein plith—fod dau neu dri o'r Saint, y rhai oeddynt dan droseddau, yno gyda hwy, ac yn cyfseithu iddynt, ac yn achosi iddynt gredu yn ddrwg am danom, fel ag y bu swyddwyr y llong, a'r cadben hefyd, yn chwerwach wrthym wedi'n nag erioed o'r blaen, a gwaith mawr a gefais yn ei dawelu. Gorfododd eu cynnalaeth hwy i ni beidio ymarferid y doniau ar ganol y cwrdd, er ein galar, eithr nid cyn i ni gael cysur mawr drwyddynt, a deall rhyw bethau am danoch chwithau yna, &c. Hysbyswyd ni fod plaid o'r rhai a siomwyd yn eu hancan tuag ataf fi wrth gychwyn, yn cynllwynio i ddial ar fy nghydsyddwyr anwyl sydd yna ar fy ol; eithr na lwyddant. O, Arglwydd nef, cadw hwynt. Hefyd, fod llawer o'r Babiloniaid yn gweddio am ein haelwyddiant, a'r Saint am ein ffyniant. Prydnawn; gwynt yn deg. Cwrdd Saint rhagorol; ac yr oeddyn wedi ymceillduo i'r pen ol i'r llong, lle ni allai y Babiloniaid, na'r bradwyr oedd yn ein plith, ein rhwystro i swynhau y doniau ysbrydol, pa rai a'n cysurasant yn sawr. Ordeiniwyd Daniel, Daniel a Benjamin Francis yn henuriaid. Rhoddwyd llawer o gynghorion o barthed i ieuchyd a gwisgo, a'r anghenrheidrwydd sydd am i bob un ofalu am sefyllfa eu cyllia, yr hyn a barodd i hawb braidd ddyfod i ymosyn meddyginiaeth, gan fod yr olew wedi darfod. Mae hyn yn anghenrheidiol er rhagflaenu y dolur rhydd. Gofaled pawb am hyn.

—9. Dygodd ein Duw ni yn ddiogel drwy beryglon y noson

hon hefyd, a gwenold arnom trwy barhau y gwynt o'n plaid. Am 8 o'r gloch, daeth agerfad heibio i ni, ar ei ffordd o Havana tua New York, ac hefyd gwelsom dair o longau rhyfel Prydeinig. Prydnawn, gwelsom ororau Florida, cyfandir America. Yr oedd y tir yn isel a thywodlyd, ychydig goed yma a thraw; ac, ond barnu wrth y mwg a ymddyrchafai yn golofnau o'r naill fan a'r llall i'r cymylau, y mae yma hefyd ryw fath o drigolion yn hywiolaethu. Hwylasom ar hyd y goror hwn hyd y nos; gwelsom ddau oleudy,—un yno, a'r llall ar swpyn o ynysioedd bychain a chreigog, pa rai a gyfenwir y Fortugas. Wedi amgylchu y rhai hyn, ar doriad y dydd dranoeth, newidiasom ein cwrs i ogledd-orllewin; ac yr oeddym yma yn gadael y Gulf Stream o'n hol, ac heb braidd 500 o filltiroedd i gyrhaedd New Orleans. Y "N. E. trade winds," yr hwn a'n cariasai yn gysson a chyflym am yn agos i'r pythefnos diwedda, yn deg yma etto. Ychwaneg o ddwfr yn cael ei ranu allan tuag at olchi, o herwydd fod genym ddigonedd ar y bwrdd fuasai i barhau am fis etto. Ac ni allwn gyffelybu yr oiygfa ddiwyd ar y chwiorydd oddiamgylch y deck yn golchi, ddim yn fwy, nag i'r golygfeydd a welais wrth ddyfroedd poethion y ffwrneisiau haiarn yn Merthyr, ar ddydd golchi! Golchid y deck isaf, a than y gwelyau, â "chloride of lime," er puro yr awyr. Mrs. Williams yn glafach. Pawb yn darparu eu cistau, &c., ac i fod yn barod i adael y llong cyn hir. Cynnygiwyd ychwaneg o luniaeth o "siop y cwmpeini"; eithr yr oedd y fath lawnder gan bawb, fel na ddaethant i'w ymofyn; dywedent fod eu ffetanau a'u llestri oll yn llawnion, fel na feddent le i gynnal ychwaneg; a dyweda llawer na fu ganddynt y fath amrywiaethau na llawnder o fwydydd o'r blaen yn eu hoes. A dywedaf finnau y dylai y neb na foddlonid ar yr ymborth hwn, gael ei gau yn y ffwrn am yspaid, fel lap-dog y foneddiges hono!

Prydnawn Mawrth; gwynt yn ysgafn, a'r mor yn dawel; yr hinsawdd yn anghysurus o dwymn. Gwelsom amryw longau, fel pe deuent allan o New Orleans. Mrs. Williams, o Ynysybont, ger Tregaron, yn gwaelu yn gyflyn, ac argoelion na byddai byw yn hir. Dywedodd wrth ei meibion a minnau nad oedd nemawr ddewis ganddi, pa un ai marw yn awr, ai byw yn hwy a gaffai. "Mae dymuniad mawr ynof," ebe hi, "am gyrhaedd Seion; ac ofnaf, pe bawn farw ar y mor, y digalonai hyny ereill, yn eu hen ddyddiau, i anturio dros y cefnfor ar fy ol; canys boddllawn wyf i farw, yn hytrach na bod yn rhwystr i achos Duw: o'r ochr arall," ebe hi, "dymunaf fyned i orphwys yn awr yn nghol fy Iesu, os da yn ei olwg." Dywedodd mai y faint fwyaf a gafodd erioed, oedd cael dod yn aelod o wir eglwys Mab Duw—nad oedd yn dychryn yn ei mynwes o bŵrthed i'r byd arall, ac fod ei chrefydd yn awr yn profi ei grym yn fwy nag erioed. Gofynwyd iddi, a oedd hi yn edifarhau o herwydd iddi ymadael â'r Methodistiaid (gyda pha rai y bu yn aelod parchus am 55 o flyneddau)? Atebodd, fod yn well ganddi yn awr na'r byd i gyd, ei bod wedi cael byw i glywed pregethiad yr efengyl gan y Saint; a chynghorai ei meibion yn ddwys i barhau yn ffyddlawn hyd angen, fel y caffont,

gyda hithau, adgyfodiad gwell. Ymddibynodd, drwy ei nychdod, ar ordinhadau yr eglwys, ac ni chlybuwyd grwgnach o'i geneu. Parhaodd yn ei chof drwy y nos; ac am chwarter wedi pedwar boreu dranoeth, ymadawodd ei hysbryd mewn tangnefedd, gan adael gwên ar ei geneu. Cafodd bob amgeledd, cymhorth, a thiriondeb gan bawb, ac yn enwedigol gan ei meibion flyddlawn, y rhai a'i parchai fel eu heneidiau eu hunain; ac ni flinasant braidd ddydd a nos yn ei gweini, ei chysuro, a'i bangeleddu. Yr oedd hi wedi cyrhaedd yn mhell dros bedwar, ugain mlwydd o oedran.

Dydd Iau, Ebrill 12, wedi gwneyd pob darpariadau angladdol a ellid, pregethwyd ei phregeth angladdol; ac wedi hyny, cyflwynwyd hi i'w gwely gwlybaidd, yn ngwydd y cannoedd mudolion a edrychent yn syml a threfnus ar yr olygfa sobr, a'r cantorion yn canu. Ac wedi hyny, ymlwybrodd ein hannedd sigledig yn mlaen, o'r olygfa alarus; yn unig ar y cefnfor mawr ymrodiai yn araf, a'r caddug du oedd ei galar wisg. Yr haulwen hefyd, er maint ei rym a'i ddewrder, eisoes a ymdrwsiasai yn ei alarwisg gymylawg yntau, yn y gorllewin pell, pan ganfuodd un o famau yn Israel yn cwmpo ar ei ffordd i Seion. Oll! oll i gyd yn brudd eu gwedd. Y noson hono a basiodd; a dim ond y shark, bysgodyn creulawn, a'i ddannedd hir a fforchog, yn awr a efelycha y ci flyddlawn wrth feddrod ei feistr, a arosodd yno ei hunan yn gof-adail o'i gorweddle hi. Er yn nghanol y pysg o'r eigion chwerv, hyd ei chyfodiad, heddwch fo i'w gweddillion, a chlodfawr fo ei henw. Boreu dranoeth, ar doriad y wawr, croesaw, ddwyreinwynt hoff; tosturiodd wrth ein cyflwr yn eiddigeddus, chwythodd ymaith ei galarwisg—ein galar, o'i swrthni a ymysgydwodd—megys Phoenix o'r lludw, newidiodd ei gwedd o'i phen i'w thraed—mewn gair, fel Dafydd gynt ar ol marw ei faban, ein llong, yn ei llawn wisg, fel y march i'r frwydr, a ymruthrai dros y tônau gwyllt,—ymgampiai i ddifyru ei galarwyr â'r gobaith o weled eu porthladd y fory. Er hyny, cyn i'r fory ddod, yn fradwrus troes i ni, a chwythodd ereill tua'r dwyreinyd. Yr haul yntau, erbyn hyn, er ei gydymdeimlad galarus neithiwr, a droes yn boenydiwr; o'i gawell boeth yn gryf poenydia bawb â'i belydrau tanbaid.

Gwener.—Gwelwyd amryw longau. Gwelwyd hefyd y rhyfeddod mwyaf a welodd rhai yn eu hoes. Er gweled angladd ddoe yn ei ddwysaf olygfa, heddyw gwelir priodas hynod a mawreddig, sef y "dyfroedd sydd dan y ffurfafen, a'r dyfroedd uwch y ffurfafen," yn ymgysylltu drwy *water spouts* cedyrn a nerthol. Yr elfenau, yn eu hymffrost, a geisiant, drwy gydseiniad, i ddifodi pob peth yn ein ffurfafen ni, a chymysgu yr oll yn ddwfr-fyd. Yn yr ymdrech hyn, rhuant yn uthr; troellant erw neu fwy o'r berw hallt, fel pe bai yn y crochan; yn eigion ei grochan y pysg a welir hllithdraplith yn ehedeg o'u hanfodd o'u helsen i'r awyr. Y gerwyn fawr ddigofus, yn ei grombil hunan-gynhyrfiol, a genedla gorwynt nerthol, yr hwn o blaid ei elfen a chwyth ei wrthwynebydd fel peiswyn hyd wyneb y dyfroedd. Er hyny, brwydro a wna, er priodas gynneu, a chyndyna am y feistrolaeth! Estyna

ei ben i'r wybr yn fawreddig a hyf, fel clogwyn Gwyddfa ein gwlad; oddiyno dysgwylia ei gymhorth;—nid yn ofer chwaith, ond anon, dealla ei gymhorth fry, a gwelaf eu cerbydau yn brysio i'w gyfarfod! Y cymylau, er eu trwch, holleti a wnant; o'r darnau gweua wddf hir, braff, troellog. Yn gyflym i lawr dynesu a wna; prancia y rhan isaf i'w gyfarfod! 'Nawr undeb a wneir; cymmysgu a wna—priodas hardd sydd rhwng y gwlybwr hallt mawr a'i elfen sydd fry! Syndod y fath goffeidio! ie, cymmysgu a chusanu sydd, nes chwysu yr holl heli o hono! Yr elfen hon yn wir a droes mewn priodas gynt; yr elfenau yn awr, drwy groewi yr hallt, a ffugiant wyrth eu Deddf-roddwr! Am ennyd meddylid mai curo wnai y dwir, a llyncu pob peth i'w ferw. Eithr mewn pryd, fel pan foddwyd ein hyd, trugaredd o'r nef sydd yn gweu; "bwa y nef" yn insel cyfammud i Noah a roed—hwn a adfywiodd fydd yr edrychwyr. Ar hyn, "o'i ddwrn" gollyngodd Ef wynt i helpu y corwynt gwân isod; i'r ymgyrch aruthrol ymuno a wnant; o'u blaen ysgubant y water-spouts certh yn yfflon dracbefn i'w lleoedd. Ac, er ceisio, dro ar ol tro, o'u dyfrllyd fedd ni chodant eu pen ddim uwch na brig eu tônau.

Nid o'n hamgylch elfenau yr unig; heddyw, yn cyffro y sydd, ond nwydau mudolion; rhai hesyd, wrth arch tywysog yr awyr, sydd yn berwi. Ei fyddin fradwrs yn deilwriaid a dront; eu gwaith yw gwneyd mwgwd o'r caddug i amdoi penau eu hudolion; gofidus yw dweyd fod llwyddiant o'u plaid; eu capiau mor es mwyth yn ffio y sydd, nes ofnaf eu hoffir gan rai hyd eu dystryw. Nid byddinoedd ar dir yn unig a fedd certh frenin Babilon, ond dealiwn erbyn hyn, ei lyngesau hesyd sydd yn chwifio eu baneri ar holl foroedd. Yn chwilfriw yr eled ei deyrnas ar frys; ar fôr ac ar dir ei ddeiliaid yn fradwyr iddo fyddo yn troi; ei sawrhydi, gan forfil, O na chai ei lyncu; i'r eigion aed hwnw, a chlo ar ei geg—yr allwedd genyf finnau yn cadw!

Sadwrn, y 14eg. Gwynt yn groes. Adar y tir yn ehedeg i'r llong wedi blino, a'r plant yn eu dala a'u dofi. Edrych allan am dir yn fusi.

Sul, y 15fed. Gwynt yn lled groes, ac yn chwythu yn arw; llawer yn hanner clwyfus, rhwng biraeth am y tir a chlesyd y mor. Pasiwyd yn y cynghor i esgymuno William, mab B. Jones, Aberdâr, a'i wraig; ereill o'r teulu nemawr gwell: achosasant i'r Saint lawer o ofid, drwy eu camgyhuddo wrth y cadben, a gwarth-ruddo ein crefydd anwyl, &c. Mae pob gobaith yr edifarha Eben. Thomas. Gofid mawr drwy gyfrinachu gormod â phobl y llong, ol a blaen. Llwyddodd un o honynt, er ein gwaethaf, i benffoli a dyrŷu morwyn un a fu mor dirion â thalu ei chost o Babilon. Gofalaf fi yn well tro nesaf, na chaiff pobl haelionus eu twyllo gan grotesau yn dod i garu, yn lle i wasanaethu. Cadwyd cwrdd gweddi am ddau ac am chwech. Y môr yn berwi yn erwin drwy y nos.

Llun, yr 16eg. Am wyth o'r gloch y boreu, aethym i ben blaen y llong, a gwelwn golofn o fwg o hirbell, ac yn dyrchafu i'r awyr. Yn fuan deallasom mai agerfad o New Orleans ydoedd, yn dod i'n

afarsod; agorfad arall, o'r ochr arall, am y cyntaf a redai tuag atom; a chyn pen dwy awr, yr oedd y ddwy yn ein hochr. Rhosom raff fawr i un o'r ddwy, yr hon a'n tynodd, erbyn canol y dydd, i geg afon y Mississippi. Mawr oedd llawenydd pawb, a'u diolchgarwch, am gyrhaedd hyd yma. Y mae genym 100 milltir etto i'r ddinas. Cyrhaeddasom dydd Mawrth, y 17eg, oll yn iach. Yn fuan, cychwynwn oddi yma i lyny yr afon, i St. Louis.

Bellach, ar frys, ffarwelaf y tro hwn, gan fod arall fusnes yn fy ngalw. Saint anwyl, byddwch ffyddlawn i'r alwedigaeth nesol y'ch galwyd iddi, a brysiwch barotoi i ddod ar ein hol. Gwrandewch ar lais eich llywyddion; a'r Arglwydd a'ch bendithio, yw gweddi barhaus a dymuniad calon.

Eich brawd yn Efrogyl Crist,

D. JONES.

LLYTHYR ODDIWRTH THOMAS JEREMY AT OLYG- YDD "UDGORN SEION.

Orleans Newydd, Ebrill 18, 1849.

ANWYL FRAWD DAVIS,—

A FYDDWCH mor garedig â rhoddi benthyg eich 'Udgorn' i mi, i swnio ynddo am y waith gyntaf o wlad bell. Yr hyn ydwyf am wneuthur yn wybodus drwyddo, yn fwyaf neillduol, yw rhoddi hanes ein mordaith o Lynlleifiad hyd yma. Dydd Llun, y 26ain o Chwefror, tua dau o'r gloch prydawn, dechrenasom ein mordaith; ac wrth fyned allan o'r Waterloo Dock, canasom Ffarwel y Saint. Ar yr amser hwnw, yr oedd ynof ryw deimladau rhyfedd iawn; fe, mor rhyfedd, hyd nes yw yn waith rhy anhawdd i mi eu disgrifio ar bapyr ac inc. Cofiaf am wynebau siriol fy ffyddlawn frodyr, William Phillips o Ferthyr, Abel Evans, Eleaser Edwards, John Davies, David fy mrawd, a Daniel Evans, Felinfach, Ystrad, Ceredigion, pa rai a ddaethant o Gymru i'n hebrwng hyd y gallasant. O, mor hyfryd oedd y gyfeillach a gefais gan rai o'r brodyr hyn lawer pryd yn Nghymru. Byddai y dydd weithiau yn rhy fyr i ni ymddyddan am y pethau a berthynant i deyrnas Dduw; cymmerem y nos yn estyniad ato yn aml, a safai cwsg yn mhell oddiwrthym ni, tra byddai ereill yn ddigon esmwyth yn ei afael. Y pryd hwn deuai i'm meddwl pa bryd y cawn eu gweled etto? Dychymmygwn glywed rhywbeth yn ateb, na fydlwn ddim yn hir cyn eu gweled draw yn Seion; ac ar hyny ymwrolais.

Pan oeddyw yn myned allan o'r porthiadd, gwelais fy anwyl

Jones i ni, o barthed i adgyfodiad y meirw—sef, “Pa fodd eu cyfodir, ac â pha rhyw gorff y deuant?” Mae mwy o ddirgelwch yn hyn nag y meddylia rhai.

Gwelaf fod fy llythyr yn myned ynfaith; rhaid tynu at y terfyn, er mor flasus yw genyf roddi hanes ein mordaith hyfryd; ond, cyn terfynu, dymunaf hysbysu fy mrodryr a'm chwiorydd anwyl, pa rai sydd yn bwriadu ein dilyn etto tua Seion, am ofalu bod yn ufydd i'w llywyddion mewn pob cynghor a gânt ganddynt o bryd i bryd, ac felly cant lawenydd mawr yn yr Ysbryd Glân: o'r ochr arall, os anghofiant y cynghor hwn, a diystyru yr offeiriadaeth santaidd, gwell i'r cyfryw aros ar ol, hyd nes y deuant yn feddiannol ar ddigon o Ysbryd Duw, i fod yn ostyngedig, addfwyn, boneddigaidd, ac hawdd eu trin.

Anwyl frodyr a chwiorydd, brysiwch i ddyfod ar ein hol, gan gosio cadw y cynghorion uchod yn eich cof, a chosio ddywedyd o Iesu Grist mai gwyn eu byd y rhai addfwyn, canys hwy a etifeddant y ddaear.

Yn awr, anwyl frawd Davis, wedi bod morfaith, terfynaf, gan eich hysbysu ein bod wedi cyrhaedd yma yn iach. Mae fy ngwraig yn cyduno â mi i'n cosio atoch yn garedig, gan ddymuno pob daioni i chi.

Eich anwyl frawd yn Nghrist,

THOMAS JEREMY.